

Jí² 'lái² 'wii²¹² gasii¹ in San Pablo tíi² Timoteo

Sii¹ in Poo² jí² tya' Timoteo

1 1 Jna-a, Poo², sái³na 'e jí² lo. Lii¹na tsá² tya' Jesús to² tyu² Dios Jmii²¹ 'in jmoo¹o tiin¹³na' joongi to² tyu² Ña'ñu¹u' Jesucristo. 'Ii-o uncoon¹³ jna' la ngóo¹ 'naai¹³. **2** Sái³na 'e jí² lo tyi'i, Timoteo, joon lawa yuu²¹ tyiia 'nu tsu galija²mo líi²u Jesús 'wii¹³ jna. Cwocwo¹o Dios Ñu¹u' coon¹³ Ña'ñu¹u' Jesucristo 'e jmaa¹a feei¹-tsi tyi'i coon¹³ fo'feei¹ tyi'i joon 'e seen²¹mo'o tyú².

Jo cwo³o 'e²e tsá² xeei²¹ júu³ tajuu²¹

3 La jéei¹gi gangóo³oo li sii²¹ Macedonia gamí³ii tyani'i 'e jon¹on fu Efeso, 'e tyuu¹³u to² 'inlíi¹³ tsá² do 'e jo 'e²e tsá² xeei²¹ júu³ 'e jo jo¹. **4** Cwo³o cwáain¹ 'in tsá² do 'e jmáa¹a cu²-tsi coon¹³ júu³ tya' tsaun'áai¹ joongi coon¹³ jí² 'lái² tya' 'líi²¹² tsacøøi¹³ tsu 'e júu³ lo jmoo¹o jmai² 'e jo cwo¹ tsá² júu³ ruu²¹i. Jo uncoon¹³ 'e júu³ do wa'a litsáai¹gi-tsi tsá² Dios.

5 'E 'yu to² tya' júu³ tyú² tya' Dios 'e 'iin²¹²mo tsaruu²¹i coon¹³ 'e tyú²-u, jo tóin¹ júu³ tya'a, joon joo¹o líi². **6** Pe 'inlíi¹³ gatuu²¹o 'e júu³ lo joon gali'in²¹²in nuu¹un júu³ 'e jo tyiin². **7** 'Iin²¹²in líi¹in tifo² pe jiin¹³ yaai jo øøi²¹-tsi 'ee 'e faa²¹a jon'gi øø²¹-tsi 'ee 'ee¹e xufiin¹³ 'ee¹o jo cu²-tsi.

8 Ne²o' 'e tyú²-u 'e ley gacwo¹o Dios tsá² wa'a líi¹ jmoo¹o tsá² coon¹³ jiin¹³ la 'iin²¹² Dios. **9** Ne²o' 'e ley do jon' tya' 'in jmoo¹o 'e tyú², pe tya' jileei²¹ 'in jmoo¹o 'e gó², tya' 'in jo 'ee tsaa²¹gi-tsi, tya' 'in jo nuu¹³un, 'in jo un'goo²¹ Dios, 'in røøi²¹ tsaa². 'E ley do tya' jileei²¹ 'in ungøøi¹ Dios, 'in faa²¹a 'laa²¹ tya' 'e tyú², 'in jngáai¹³ sáa³ jmii²¹ joongi jngaai¹³ ruu²¹i. **10** Joongi 'e ley do tya' 'in feei¹ tsamí² joongi tya' tsá² 'in tóin¹, 'in 'iin²¹²in tsañuu¹, joongi tya' tsá² 'in ngi¹ to² 'uun²¹in tsá². 'E ley do tya' 'in jmoo¹o júu³ tajuu²¹ tya'ni tsaa²to², joongi tya' doñi'in tajuui²¹. 'E ley do tya' jilaa²¹ 'e sá² 'e faa²¹a 'laa²¹ tya' 'e júu³ tyú². **11** Joon 'e júu³ tyú² lo júu³ tya' Dios 'in tyúi¹ joon 'ii gatyaa¹ cwóo³oo.

Cwoo¹-o Poo² 'maai¹³ Dios 'wii¹³ fee¹mo-tsi Dios 'wii²¹² tya'a

12 Joon cwo¹oo 'maai¹³ Ña'ñu¹u' Jesucristo, 'in cwo¹ jna pí². 'Ii-o nigacoon²¹o cwáain¹ 'e tyú¹na joon nigacwo¹o jna to² tya'a 'e jmáa³aa. **13** Nigacwo¹o jna 'e to² lo fiin¹³ foo²¹-oo 'laa²¹ tya'a la mo jéei¹ joon ga'øø²na tsá² tya'a joongi gajmee¹³na pe Dios galifee¹mo-tsi tyiia tsu la mo jéei¹ jo tsáai¹-tsii júu³ tyú² joon jo ñí³ii jilaa²¹ 'e jmóo³oo. **14** Pe cwa¹³ tya' Ña'ñu¹u' 'áa¹mo galifee¹ coon¹³ jna joon galili³oo xiiala 'iin²¹²in Cristo Jesús jna 'e jo¹o líi²na.

15 'E júu³ lo 'e la ja²mo, joon la jilee²¹mo 'ná¹ litsáai¹-tsi Cristo Jesús nigajó² ni cwoo¹³ juncwii²¹ 'e jmáa¹a tiin¹³ jileei²¹ 'in røøi²¹ tsaa² joon jna-a nifu-gi jee²¹² 'ii. **16** 'Áa¹mo garøø²¹na tsaa². Joon Jesucristo gáii²mo tsaa² tyiia. Joon mo gajmaa¹a Jesucristo feei¹-tsi tyiia ga'e²e Dios tsá² 'e lí²-i 'iin² tsaa² tya' tsá² 'in jalíin² ciin²¹gi 'in jai² líi² 'ii. Joon coon¹³ la joon itéin² tsá² coon²¹ tøø²mo fu li tyíin¹ Dios Jmii²¹.

17 'Wii¹³ joon cwofaa²¹a' coon²¹ tøø²mo júu³ tyú² tya' 'in Dios Jmii²¹, 'ii seein²¹ coon²¹ tøø²mo, jo júun²in jon'gi lí² jøøi² tsá² 'ii. 'Ii-o jaain²¹ Dios 'in jmi¹-tsi. 'Ná¹-a un'goo²¹o' 'ii. Joon 'ná¹ cwoo²¹o' jilaa²¹ 'e 'ya²gi tya'a coon²¹ tøø²mo. Amén.

18 Yüün²¹ tyiia, Timoteo, tyíi³aa cwoo¹o 'elo. Cwoo¹³-o'o cwojmaa²a la gafuu²¹²uu 'næ coon²¹ tún² jiin¹³ la gajin² tsaru¹u' la mo jéei¹ 'ii²¹ tya' Dios. Joon coon¹³ la joon lí² tyuu¹³u jilaa²¹ júu³ 'e jo jai².

19 Cwotyán² pí² jilaa²¹ 'e jai² líi²u. Jmai² 'e tyú²-u 'i¹-o'o tsu 'inlíi¹³ nigaxee¹mo-tsi 'elo, gatuu²¹o jilaa²¹ 'e jo¹ líi². **20** La joon gangangíi² Himeneo coon¹³ Alejandro. 'Wii¹³ joon gacwo²moo 'in 'líi¹³ Satanás 'ii la coon²¹ cwountsáa¹ 'e jo faa²¹a 'laa²¹ tya' Dios coon¹³ júu² tya'a.

'Ee¹e Poo² xiiala faa²¹ tsá² júu³ tyú²

2 **1** 'E júu³ 'íi³ii lo 'e tyiin²gi 'e mí¹ tsá² tyani Dios joon faa²¹a tsá² júu³ tyú², mí¹ tsá² jmi²¹² 'aa²¹² joon cwo¹o 'maai¹³ Dios tya' jileei²¹ tsá². **2** 'Ná¹-a la joon tya' tsaa²to² joongi tya' jileei²¹ 'in 'oo¹o to², la coon²¹ 'e jo untyíin²gi tsá² jna' joon seen²¹na' tyú²-u tyani Dios joongi tyani tsaruu²¹na'. Tsaa²-oo' Dios, tyú¹naa' coon¹³ tsá². **3** 'Elo-o 'e tyú² joon 'yaa¹mo-tsi Dios Jmii²¹, 'in jmoo¹o tiin¹³na'. **4** Tsu 'ii-o 'iin²¹²in tiin¹³ jilee²¹mo joon wa'a cwoliñi¹o 'e júu³ jai². **5** Jaan²¹mo Dios 'in seein²¹, joon jiin¹³ 'ña'a Jesucristo, 'in galíi¹ tsañuu¹, lí² jmáa¹ 'ii²¹ coon¹³ Dios la joongi coon¹³ tsá². **6** Tsu 'ii-o gacwóoi¹ 'ña'a 'e tyí² jilaa²¹ tsaa² tya' tsá². Joon mo tí² 'ii²¹ gajmaa¹a Dios Jmii²¹ júu³. **7** 'E júu³ ja²mo lo, Dios gatyii¹³in jna wa'a nicwóo³oo 'e júu³ do. Gatyii¹³in jna 'e 'e²ee jileei²¹ tsá² taain²¹² ni cwoo¹³ juncwii²¹ xiiala gajmaa¹a Dios 'ii²¹ 'e tiin¹³ tsá² mo jai² líi² tsá² 'e júu³ ja²mo 'e fo³oo lo.

8 'Iin²¹²na wa'a 'e faa²¹a tsañuu¹ júu³ tyú² doñixiia' téein². Joon mi faa²¹a júu³ tyú² do cwoseein²¹ tyú², ca nii²mo alma tya'a jon'gi 'nii²¹-tsi, jon'gi to² tíi¹. **9** La joon tsamí², 'iin²¹²na 'e ci¹o siin¹³in 'e jo suuin²¹ tsañuu¹ 'ii joon 'e ngi¹ coon²¹ tún², jon'gi coon¹³ jmí³ tyí¹i 'in caai¹³ cwanáa¹³ si perla 'ee. Jon'gi ci¹i siin¹³in 'e 'moo¹³ líli¹. **10** Pe jmoo¹o jmai² 'e tyú² tya' jileei²¹ tsá² la tíi² jmá¹ tsamí² 'in jin²o 'e tsaa²-tsi Dios Jmii²¹. **11** Jileei²¹ tsamí² 'ná¹-a jón² tii² jee²¹² lí licaain²¹ tsá² 'in jai² líi² Jesucristo joon 'ná¹ nüü¹³o. **12** Jna-a jo cwo¹oo líin² tsamí² tifo² jon'gi tyu²u to² tsañuu¹ jiin¹³ 'e ján² tii². **13** Tsu Dios gajmeei¹ Adán nifu joon mi yuui¹³ joon gajmeei¹ Eva. **14** 'In 'líi¹³ do jo gacon²on Adán too² pe gacon²on 'in tsamí² do too² joon 'ii ga'aa¹o tsaa² nifu. **15** Xüfiin¹³ 'ná¹

nii²¹ tsamí² wúu¹ mi liseein²¹ jóon¹on 'wii¹³ tsaa² tya' Eva jileei²¹ tsamí² lí²-i tiin¹³in wana jo¹o líi² joon 'iin²¹²mo Dios joon un'øø¹i yaai 'e ngi¹ coon²¹ ce tún²un.

Xiiala líi¹i 'in tyu² to² jee²¹² 'in jai² líi²

3 1 Jo¹o 'e júu³ lo: wa'a 'iin²¹²in tsá² 'e 'áa¹a coon²¹ to² jee²¹² 'in jai² líi², 'iin²¹²in 'ido coon²¹ 'e tyú²-u. **2** Jileei²¹ 'in lín² tsacøøi¹³ jee²¹² 'in jai² líi² 'ná¹-a ngi¹ 'e jo lí² cwo¹o tsá² 'ido tsaa². Lí²-i liseein²¹ jiin¹³ jaan²¹mo 'oo²¹²o. 'Ná¹-a ngi¹ coon²¹ tún², 'ii¹ ja²mo, jmoo¹o jmai² 'e tyú²-u. Joon 'in tsá² do 'ná¹ jmáa¹a feei¹-tsi tya' jileei²¹ 'in tsafeei¹³ 'ii fu tya'a. 'Ná¹-a jon litíi²¹ 'e¹e tsá². **3** Jo lí² wa'a ngi to² 'iin¹ jon'gi wa'a tíin¹in jon'gi wa'a 'iin²¹²in cuu² 'áai¹ 'e jo mo gajna²a. Li' cii¹³i soo²¹-tsi 'ná¹ fee¹mo-tsi tya' jileei²¹, jo 'noo¹o mii¹³, jon'gi 'iin²¹²in cuu². **4** 'Ná¹-a jon líníi¹o xiiala tyu²u to² inuu tya'a joongi tyu²u to² jóon¹on cwolinuu¹³un jo to²o mii¹³. **5** (Tsu wa'a jo ñi¹ tsá² xiiala tyu²u to² 'inuu tya'a xiiala lí² 'áa¹i 'in nigalijai² líi² Dios.) **6** Joon jo lí² lín² tsacøøi¹³ jaain²¹ tsá² 'in nijai² líi² catá². Jo cweei¹ tyu²u to² tsifu tsu wa'a jmaa¹a jlóo³ joon i'láa¹ la ga'láa¹ Satanás. **7** Joon wa'a ilín² jaain²¹ tsá² tsacøøi¹³ jee²¹² 'in jai² líi² 'ná¹-a líi¹i la líi¹i jaain²¹ tsá² 'in jmoo¹o tyú²-u jee²¹² tsagoo¹o 'in jo jai² líi² Jesucristo. Wana jo la joon icwo¹ tsá² 'ii tsaa² joon ifaa²¹a tsá² 'laa²¹ tya' jileei²¹ 'in jai² líi² Dios. Joon tee²¹i nilá² tya' 'in 'líi¹³.

Xiiala líi¹i 'in uncoon¹³ tsacøøi¹³ jee²¹² 'in jai² líi²

8 La joon jon 'in tsá² 'in uncoon¹³ 'in tsacøøi¹³ jee²¹² 'in jai² líi², 'in sii²¹ diaconeses, 'ná¹-a ngi¹ coon²¹ tún². Jo ngi¹ cwaa²¹ sii¹³i jon'gi wa'a ngi¹ to² 'iin¹ jon'gi wa'a 'iin²¹²in cuu² 'e jo mo jna²a. **9** Joon 'ná¹ ñi¹o jo cu²-tsi jilaa²¹ júu³ 'e gacwo¹ Dios jna¹ 'e jo¹ líi²na'. Joon jo 'i¹-tsi 'e gó². **10** La nu'gi ilí² uncoon¹³ tsá² tsacøøi¹³ 'ná¹ cón² tsá² cwáain¹ xiiala ngi¹ 'ido joon wana jo 'ee tsaa² tya'a sá² lí²-i uncoon¹³on. **11** La joon jon 'oo²¹²o 'ná² ngi¹ coon²¹ tún². Jon'on tsamí² 'in sii²¹i júu³ 'atsaa²¹. Ca nii²mo jmáa¹a jo 'láa¹a jilaa²¹ 'e jmoo¹o. **12** 'In tsá² 'in uncoon¹³ tsacøøi¹³ do jiin¹³ jaan²¹mo 'oo²¹²o iliseein²¹ tya'o. 'Ná¹-a tyu²u to² jóon¹on tyú²-u coon¹³ jilaa²¹ inuu tya'a. **13** Tsu jileei²¹ 'in untsiin¹ tyú²-u 'e to² 'e uncoon¹³on tsacøøi¹³ do jnaa²¹a coon²¹ 'e tyú² tya'a joon lí² faa²¹a jo cu²-tsi cwáain¹ tya' xiiala tsaa¹-tsi tsá² Cristo Jesús.

'E ja²mo líi²na'

14 Jilaa²¹ júu³ lo gatón³oon ni mo'jí² lo 'e sí³na tyi'i xufiin¹³ 'i¹-tsii yí³aa la jmoon¹o. **15** Pe wa'a la 'ii²¹²na lí²-i líní³i xiiala 'ná² jmaa¹a tsá² jee²¹² 'in jai² líi² 'in lín² lawa cwo¹ tya' Dios 'in jiin¹. Joon la cwaain²¹ 'oo²¹ ni tiifuu²¹ cwo¹ pí², la joon jon 'in jai² líi² Dios cwo¹ pí² tya' 'e jai²

tya' Dios. 16 Joon ja²mo. Fee¹ 'áa¹mo 'e júu³ 'uui²¹ 'e Dios ga'e²e tsá² xiiala seein²¹ tsá² tyú² tyaní¹ 'e jin²:

Gacwéi Dios líi¹ tsá², joon 'in Espíritu Tyú² ga'íi² júu³ 'e tyú¹mo 'ii. Níi²mo ángeles 'ii.

Joon gacwo¹ tsá² jileei²¹ 'in taain²¹² nicwoo¹³ juncwii²¹ júu³ tyú² tya'a.

Joon jo¹o galíi² tsá² taain²¹² juncwii²¹ 'ii.

Joon ga'ii²¹mo Dios 'ii fu ñu'fú² tún¹.

Xiiala líi¹ 'in tú² 'e júu³ jai² tya' Dios

4 1 'In Espíritu Tyú² gatya¹ júu³ 'a la ti 'e jee²¹² jmi²¹² li gatséi¹ 'inlíi¹³ ituu²¹ jiin¹³ 'e tsáai¹-tsi. Joon iunjíi²o jilaa²¹ espíritu gó² incón² 'ii too² coon¹³ jilaa²¹ júu³ tya' 'in 'líi¹³. 2 Inúu¹u tsá² 'in faa²¹a júu³ tajuu²¹ lawa júu³ ja²mo, tajuu²¹mo 'in jo li³gi 'e gó². La jo li³gi tyíi²mo sũu²¹ tsá² ñí³ tyíi² la joon jon 'in tsá² do jo li³gi 'e gó². 3 Untsaa¹³mo 'in tsá² do wa'a cui¹² cwoo²¹o tsá² joon tyu¹²u to² 'e sá² 'láai² nii² 'uunñi² 'e jo lí² dø¹² tsá². Pe Dios gacwoo¹ jilaa²¹ 'e lí²-i dø¹² tsá². Joon jileei²¹ 'in jo¹o líi², 'in ñi¹ júu³ jai², lí²-i dø¹² 'yaai¹-tsi wa'a cwo¹o 'maai¹³ Dios. 4 Tsu tyú²-u jilaa²¹ 'e gajmaa¹a Dios joon lí²-i dø¹² tsá² wa'a 'ii²¹i coon¹³ 'maai¹³ Dios, 5 tsu nicwaa¹³mo coon¹³ júu² tya' Dios joongi coon¹³ 'e júu³ tyú² 'e faa²¹a tsá².

Xiiala líi¹ 'in jmoo¹o to² tyu¹² Jesucristo

6 Joon wana 'e²e 'in jai² líi² Jesucristo jilaa²¹ 'elo joon tyú² jmoo²¹o, jmoo²¹o jiin¹³ la tñi² jmá¹ tsá² 'in cwoo¹ júu³ tya' Jesucristo. 'li cwo¹gi pí³ alma tyi¹i coon¹³ júu³ 'e jai² líi² tsá² joon coon¹³ júu³ røø²¹ 'e nuu¹³un coon²¹ tún². 7 Jo unjii²¹ 'e cwáain¹ tsáai² coon¹³ cwáain¹ jo ñi²¹i ti jo¹. Cwoo¹³-o'o jmaa²¹a jiin¹³ la to² tyu¹² Dios. 8 'E tyiin²moxu wa'a 'e yeen²¹ fiin²¹ tsá² yaai pe tyiin²gi 'áai¹ 'e cón² tsá² cwáain¹ xiiala ngi¹ tyani Dios. Tsu 'e júu³ lo tyan¹ 'ii²¹ 'e sáan³an' tyú² nano joongi li ngó¹gi. 9 'E júu³ lo 'e la ja²mo, joon la jilee²¹mo 'ná¹ litsáai¹-tsi. 10 Née²o' 'e tyiin²gi 'wii¹³ joon jmoo²¹o' to² 'íi³ joon nee²¹e' wúu¹. Jmoo²¹o' la joon tsu nicalitsáa¹mo-tsi' Dios 'in jiin¹. Ii-o un'øø²¹i jilee²¹mo jiin¹³ 'in tsáai¹-tsi 'ii nifu.

11 Jilaa²¹ 'elo 'ná¹ tyuu¹³u to² joon 'e²e tsá². 12 Jo ngi¹¹i wa'a jo ungo¹o tsá² 'nu 'wii¹³ xaai¹gi'i. Pe jmee¹u'un 'wo'o lawa coon²¹ li² 'e tyú²-u tyani 'in jai² líi². Jmeei² 'wo'o lawa coon²¹ li² 'e tyú²-u coon¹³ xiiala ngi³i, joongi coon¹³ jilaa²¹ júu³ tya³a, joongi coon¹³ xiiala 'iin²¹²mo'o tsá², joongi coon¹³ xiiala jo¹o líi²u Dios, joongi coon¹³ xiiala jmaai¹³ 'e tyú²-u 'i¹-o'o. Coon¹³ jilaa²¹ 'elo jmee¹u'un 'wo'o lawa coon²¹ li² 'e tyú²-u. 13 Ca mi cwée¹na cwoo¹³-o'o fo²¹o júu³ tyú² tya' Dios jiin¹³ la faa²¹a ni jí² tya' Dios, faa¹³a cwonúu² jileei²¹ tsá². Cwo'íi² júu³ 'ee 'ná¹ jmáa¹a. Joon 'e³e tsá² 'ee 'øøi²¹-tsi tsá² júu³ tya' Dios. Gacwo¹ Dios

'nu 'ii²¹ tya'a 'e jmaa²¹ a to² tya'a. **14** Jo cuu¹³ u jmaa²¹ a 'e júu³ gacwo¹⁰ o Dios 'nu mo gataan¹ an tsacøøi¹³ cwoo²¹ o tyi'i joongi gafaa²¹ a 'ii²¹ tya' Dios.

15 Í²du'-o'o jilaa²¹ 'elo. Cwoo¹³ -o'o 'e jmaa²¹ a. Joon liñi¹ tsá² 'e 'øøi²¹ gi-o'o. **16** Jøø²¹ ø 'wo'o coon²¹ tún² coon¹³ jilaa²¹ 'e 'e³ e. Cwojmaa² gi'i tsu coon¹³ la joon itiin¹³ mo'o 'wo'o coon¹³ jileei²¹ 'in nuu¹ un júu³ tyi'i.

Xiiala 'ná¹ jmáa¹ a Timoteo tyani 'in jai² líi²

5 **1** Jo jii²¹ u'u tsacøøi¹³ pe mí² i tyani¹ i lawa 'e ñu² o'o. Joon cwo²¹ o cwáain¹ simii²¹ lawa ruu²¹ mo'o. **2** La joon jon tsayuui¹³ lawa saa² o'o. Joon mi cwo²¹ o cwáain¹ 'in simí² jiin¹³ coon¹³ 'e tyú² -u 'i¹ -o'o.

3 Unjíi² u'u 'in 'yiaa'ñí² 'in jo 'in seein²¹ tya'a. **4** Pe wana seein²¹ jóon¹ on si tyii²¹ a 'ee 'ii 'ná¹ untiin¹³ in jilaa²¹ 'ee 'e 'ná¹ seein²¹ tsacøøi¹³ tya'a coon¹³ la joon ityí¹ jilaa²¹ 'e røø²¹ i tsacøøi¹³ tya'a tsu la joon 'e tyú² joongi la joon tí² -tsi Dios. **5** 'In 'yiaa'ñí² 'in jo seein²¹ tya'a 'in tsáai¹ -tsi Dios mií¹ i tyani Dios joon faa²¹ a júu³ tyú² la 'woo¹ jmií¹. **6** Pe 'in 'yiaa'ñí² 'in seein²¹ jmai² unjløøi¹³ 'ña'a jo tsaa¹ -tsi Dios, xufiin¹³ jiin¹ o pe líi¹ i lawa jaain²¹ 'in najúun² mo. **7** Cwo'i² i 'e júu³ lo 'in jai² líi² 'e jo lí² cwoo¹ tsá² tsaa². **8** Wa jo unjíi² in tsá² tsaruu²¹ i, joon tyiin² mo 'in taai² inuu tya'a, líi¹ i lawa jaain²¹ 'in jo untiin¹³ in jilaa²¹ 'e jin² in 'e jo¹ líi². Joon gó² gi 'ii lagi 'in jo tsaa¹ -tsi Dios.

9 Jo taan¹ u'un ni mo'jí² 'in 'yiaa'ñí¹ 'in jo mo tsín¹ sesenta jiin²¹ joongi coon²¹ naa¹³ 'e gacui² cwoo²¹ o. **10** Lí² -i litaan¹ u'un mo'jí² wa'a cwii¹ in tsá² 'ii jiin¹³ 'e tyú² 'e nigajmaa¹ a. Wa'a nigaunjíi² in jóon¹ on joongi wa'a nigacwoo¹⁰ o 'nú¹ li joon¹ tsá². Joongi wa'a nigauncoon¹³ o tsaru¹ u'. Joongi wa'a nigauncoon¹³ o 'in seein²¹ faí³. Joon wa'a gacwoo² -tsi 'in 'yiaa'ñí² do 'e jmoo¹⁰ o jilaa²¹ 'e tyú² lí² -i taan¹ u'un mo'jí².

11 Pe jo taan¹ u'un mo'jí² 'in 'yiaa'ñí² 'in xuui²¹² gi tsu 'ii ili'in²¹² in cui² -cwoo²¹ o tún¹ joon tuu²¹ o júu³ tya' Cristo. **12** Joon ilí² tsaa² tya'a tsu jo gauntiin¹³ in júu³ gajin² in nifu. **13** Joon mi licíiin² gi joon ilijøø² mo joon ingí¹ la tyi 'nú¹. Joon jiin¹³ 'e jøø¹ mo pe ngi¹ tyá² júu³ 'atsaa²¹ coon¹³ tsá². Coon²¹ on cwáain¹ 'ee seein²¹ tsá² xeei²¹ sii¹ júu³ 'e jo tñi². **14** Tsu 'wii¹³ la joon 'iin²¹² na 'e cuu²¹ i 'in 'yiaa'ñí² xuui²¹² gi do cwoo²¹ o. Joon liseein²¹ jóon¹ on. Joon 'ii-o inii²¹ 'nú¹ joon jo cwooi¹ faa²¹ a tsá² 'laa²¹ tya'a. **15** Tsu 'inlíi¹³ 'yiaa'ñí² gatuu² o júu³ tya' Cristo joon galíi¹ i tsá² tya' 'in 'líi¹³.

16 Joon wana tsañuu¹ si tsamí² 'ee seein²¹ inuu tya'a jaain²¹ 'yiaa'ñí² 'ná¹ -a unjíi² in mo 'ido. Jo cwo¹³ o unjíi² in 'in jai² líi² tsu jiin¹³ la joon lí² -i unjíi² in 'in jai² líi² 'in 'yiaa'ñí² 'in jo 'in seein²¹ tya'a.

17 Cwoun'goo²¹ gi tsá² 'áai¹ gi 'in tsacøøi¹³ 'in jmoo¹⁰ o to² tya'a tyú². Tyiin² gi 'in cwó² júu³ tyú² joon 'in 'e² e tsá². **18** Tsu ni jí² tya' Dios jin² in:

“Jo toon²oon' noo¹³ moo'oo²o joo'tsáa² mo 'ø¹ø mi¹³ trigo mo untyá² tsá².” Joon jin²in: “In jmoo¹o to² tí²mo 'ii²¹i 'lee¹³i.”

19 Jo unjii²in wana seein²¹ jaain²¹ tsá² cwo¹o tsaa² tsacøøi¹³ tyani¹in. Pe wana tí² gáí¹ gaai²¹ tsá² joon 'ná¹ nuu²un júu³ tya'a. **20** Jileei²¹ 'in 'noo¹o tsaa² jii²nu'un tyani jileei²¹ 'e 'in catyaaí² do itoon²¹on fo²-tsi cwoli'goo²¹o. **21** Tyíi³aa cwoo¹o 'elo tyani Dios joongi tyani Jesucristo coon¹³ 'in ángeles tya'a 'in nigatyii¹³in: Cwojmaa²a jilaa²¹ 'elo júu³ røø²¹. 'Ná¹ jmaa²a coon²¹ røø²mo tsá². **22** Jo tyi¹u'u jaain²¹ tsañu¹ ilíin² tsaa'to² jee²¹² 'in jai² líi² la jmoonoo, tsu wana galáa¹a lawa'a ga'i¹u'u tsaa² tya'a. Jo unlíi²u'u 'wo'o coon¹³ cwáain¹ lo.

23 Lawa mo tsaa¹³ tuu¹u joon mo tí¹ coon²¹ naa' mo li tsaa¹²a 'wo'o jo 'uu¹²u jiin¹³ jmi²¹ pe 'uu¹³xu'u vino ijmá¹ mí¹ tyi'i.

24 Jilaa²¹ tsaa² tya¹ 'inlíi¹³ lí²-i jná² nii² la nu'gi 'e lisá² 'ii²¹. Pe tsaa² tya' 'in catyaaí² ijmá² nii² ciiin²¹ gixu. **25** La joon jon jilaa²¹ 'e tyú² 'e jmoo¹o 'inlíi¹³ iliníi¹ tsá² la jmoonoo. Joon 'e catyiaa²gi iliníi¹ tsá² ciiin²¹ gixu.

6 **1** Jileei²¹ tsá² 'in jai² líi² Cristo 'in nitaai² tya' ñi'fii²¹²i 'ná¹-a un'goo²¹o ñi'fii²¹²i la coon²¹ jo cwofaa²¹a tsá² 'laa²¹ tya' 'e sii²¹ Dios coon¹³ jilaa²¹ 'e 'ee²¹e'. **2** Joon wana jo¹ líi² ñi'fii²¹² do Cristo 'in nitaai² tya'a do 'ná¹ un'goo²¹gi ñi'fii²¹²i. Joon 'ná¹ jmaa¹a to² tyú² tya' ñi'fii²¹²i do tsu 'wii¹³ jo¹o líi² Cristo. Joon mo jmoo¹o 'in taai² tya'a to² jmoo¹o to² tya' jaain²¹ 'in jo¹o líi² Dios joon 'iin²¹²mo Dios 'ii. 'E²du'u joon cwotyaa¹-tsi tsá² 'e jmáa¹a 'e júu³ lo.

'In jai² líi² 'ná¹ jløø³mo

3 Joon wana 'e¹e tsá² júu³ xii²¹a jmoo¹ 'ido jløø³ 'na'a. Jo røø²¹ sñi¹i coon¹³ júu³ tyú² 'e ga'ee¹ Ña'ñu¹u' Jesucristo, jon'gi jo røø²¹ sñi¹i coon¹³ júu³ 'e 'e¹e tsá² xiiala ngí¹ tsá² tyú²-u tyani Dios. **4** Tsá² 'in jo ñii¹ 'ii coonti. Jiin¹³ 'iin²¹²in 'ido jo cwo¹o júu³ ruu²¹i coon¹³ jilaa²¹ 'e sñi¹i. Joon jiin¹³ coon¹³ 'elo-o lí²-i litíi² tsá² 'e tsiwúu¹i, jo cwo¹o júu³ ruu²¹i, faa²¹a tsá² 'laa²¹ tya' tsá² xeei²¹, joon cu²-tsi tya'a. **5** Tsá² 'in gó² 'i¹-tsi 'in 'noo¹o mii¹³ coon²¹ tøø²mo. Tsá² jo ñi¹ la jai². 'In tsá² do 'i¹-tsi 'e ijmáa¹a cuu² wa'a un'goo²¹o Dios. Jeen²¹mo'o coon¹³ 'in jmoo¹o la joon. **6** Pe wana ngii²¹i 'e tyú²-u tyani Dios sá² 'lee¹³na' wa ngii²¹i 'yaai¹-tsi'. **7** Tsu jo 'ee lée³e' coonti 'e juncwii²¹ lo, la joon jon jo 'ee lí² lee²¹e' jiin¹³ coon²¹ mi júun²na'. **8** Joon wana 'oo²¹o' sin¹in' joongi 'e tyée³e' cwojmoo²¹o' jløø³mo'. **9** Jileei²¹ 'in 'iin²¹²in lisá² cuu² tya'a jo itaa²¹a tya'a joon 'ii²¹o lawa coon²¹ sí² tya' 'in 'líi¹³. Jilaa²¹ 'e súun²in ijmáa¹a 'nii²¹ tya' 'in 'iin²¹²in joon ipíin² ña'a li jo tiin¹³ tsá². **10** Suun²¹un tsá² cuu² 'wii¹³ joon jó¹ jilaa²¹ 'e gó² tya'a. Joon 'inlíi¹³ nigasuun²mo, nigatuu²¹o júu³ tyú² tya' Dios joon líi¹ wúu¹ niganii²¹ juncwii²¹ tya'a.

Cwojmaa²o'o la ngóo¹ 'naai¹³ 'e jai² líi²u

11 Pe 'nũ-ũ, tsũ 'wii¹³ tsá² tya' Dios 'nũ, tú² jilaa²¹ 'e gó² lo, joon cwocwoo¹³-o'o 'e jmaa²a 'e tyú². Jmaa²a to² tyũ² Dios. Jo¹gi cwolií²un. Cwoliíin²¹² mogi¹ Dios coon¹³ tsá². Jmaa²a taa²¹-o'o. 'Wo²-o'o jmaa²a tya' tsá². **12** Cwocwoo¹³-o'o ce caai²¹-o'o ngí²¹ la nigangi¹ 'in jai² líi² Cristo. Cwoo¹³-o'o 'e ngí²¹ coon¹³ Dios 'e seen²¹ mo'o coon¹³ on coon²¹ tøø²mo, tsũ la joon gatø¹ø Dios 'nũ. Joon tyani tsá² fúui¹ niga'i¹ júu³ jilaa²¹ 'e nigajmaa¹ a Dios 'wii²¹² tyi'i. **13** Joon nano 'i³ii 'nũ júu³ tyani Dios 'in cwo¹ juncwii²¹ tya' jileei²¹ 'in seein²¹ joongi tyani Jesucristo 'in gajmaa¹ a júu³ jai² 'e tyú²-ũ tyani Poncio Pilato. **14** Jo cuu¹³u'un jmaa²a jilaa²¹ to² gacwo¹o Dios 'nũ 'e jo lí² faa²¹a tsá² 'laa²¹ jiin¹³ coon²¹ ca mi tyũ² Dios Jmii²¹ to² 'e jneeí¹ Ña'ñũ¹u' Jesucristo. **15** Tsũ mi tyíia¹ 'ii²¹ tya' Dios Jmii²¹ ijmáa¹ a lí² jilaa²¹ 'elo. Jiin¹³ Dios Jmii²¹ lí² líi²in tsaa'to² 'in feei¹gi. Joon 'in cwaa¹³mo 'ii. Joon 'ii-o líi¹ røøi¹³ 'in feei²gi la jee²¹² jileei²¹ røøi¹³ catyaaí²gi do. La joon jon 'ii-o tsaa'to² 'in feei¹gi la jee²¹² jileei²¹ tsaa'to². **16** Jiin¹³ 'ii-o lí² cwo¹ tsá² 'e seein²¹ tsá² coon²¹ tøø²mo tsũ jo tyéi¹ 'ii. Joon táan¹in lí jná² joo²¹ líli¹. Joon jo lí² tsá² tsatyéen¹in. Joon jo mo nigalijøø²i tsá² 'ii jon'gi lí² jøø²i tsá² 'ii. Cwoun'goo²¹o tsá² 'ii ce jileei²¹. Cwolisá² 'ii²¹ tya'a coon²¹ tøø²mo. Amén.

17 Cwotyá³a-tsi 'in sá² cuu² juncwii²¹ lo 'e jo unjløøi¹³ 'ña'a jon'gi ngí¹ cu²-tsi cúu¹u pe ngí¹o jo cu²-tsi tya' Dios 'in jiin¹. 'Ii-o cwo¹o jna' jilaa²¹ 'e jløø¹³na'. **18** Cwotyá³a-tsi 'ido 'e jmáa¹ a 'e tyú². Joon cwoliseein²¹ 'e tyú²-ũ coon¹³ jilaa²¹ tyú² 'e jmoo¹o. 'Ná¹-a tyaa¹ 'ido tyú² tya'a 'e cwo¹o tsá² 'e 'oo¹-o joon uncoon¹³on 'ii 'in tyéein¹³ jmií²¹². **19** 'E tyú² 'e jmoo¹o do 'e lí² lawa tsá² jñi¹ cwuu²¹, 'iin²in uncwu² mi jñí² do, pe joon mo roo²¹ joon coon²¹ tsá² 'láai²gi lagi ga'iin² mo gajñii¹ do. Coon¹³ la joon ilisá² juncwii²¹ tya'a 'e jo¹.

Tyaa¹ Poo² cwoo²¹o Timoteo 'e cwo¹gi tsá² júu³ tyú²

20 Timoteo, un'øøi¹ jilaa²¹ 'e gatyaá¹ Dios cwoo¹o. Jo núu³un júu³ 'e jo tseein²¹ jon'gi 'e jo to² íi³in coon¹³ jilaa²¹ júu³ 'e jin² tsá² 'e 'áai¹gi jo¹, pe jon'jo¹ 'e júu³ joon. **21** Joon 'inlíi¹³ niganúu²o 'e júu³ do joon jo gauntiin¹³in 'e júu³ jo¹ tya' Dios.

Cwouncwaaí¹³ Dios 'nũ. Amén.